

Morning Dogri (NSD) National News Bulletin 23-03-2024

आकाशवाणी

- भारत नै अगले 5एं ब'रें च भूटान गी 10 ज्हार करोड़ रुपें दी माली मदाद देने दा ऐलान कीता ऐ। दौनें मुख्य राश्ट्री हितें कन्नै जुड़े दे मुद्दें पर सैहयोग करने पर सैहमत होए न।
- केन्द्री माध्यमिक शिक्षा बोर्ड सीबीएसई नै नियमें गी नेई मन्नने ते गलत तरीके कन्नै कम्म करने च शामिल 20 स्कूलें दी बोर्ड कन्नै मान्यता रद्द करी दित्ती ऐ।
- रूस च मास्को दे नेड़े इक कंसर्ट हाल च थेआरबंद हमलावरें दी गोलीबारी च 60 लोकें दी मौत ते 145 शा मते जख्मी होई गे न।
- स्विस ओपन बैडमिंटन प्रतियोगिता च भारत दे किदाम्बी श्रीकांत सैमीफाइनल च पुज्जी गे न। उनें कल स्विजरलैंड दे बेसल च मर्दे दे सिंगल्स क्वार्टरफाइनल च ली चिया हाओ गी हराया।
- आईपीएल दे 17में संस्करण दे कल खेड्डे गेदे पैहले मैच च चिन्नेई सुपर किंग्स नै रॉयल चैलेंजर्स बेंगलोर गी 6एं विकटें कन्नै हराई दित्ता।



PM-Bhutan

भारत भूटान गी अगले 5एं ब'रें च 10 ज्हार करोड़ रुपे दी माली मदाद करोग। प्रधानमंत्री नरेन्द्र मोदी होरें एहदी घोषणा अपने भूटान दौरे दे पैहले दिन थिंपु च कल दित्ती। भारत नै भूटान बशकार राश्ट्रीय हितें कन्नै जुड़े दे मुद्दें गी लेइयै सैहयोग करने बारे आपसी सैहमति बनी गई ऐ। प्रधानमंत्री मोदी होरें भूटान दौरे बारे इक संयुक्त ब्यान च आक्खेआ गेआ ऐ जे पन बिजली, सौर ते ग्रीन हाईड्रोजन दे क्षेत्रें च साफ ऊर्जा दे विस्तार आस्तै भारत ते भूटान किट्ठे रलियै कम्म करगंन। दौनें देशें रेल, शिड़क, हवाई ते जल यातायात, उद्योग आधारभूत ढांचे दे कन्नो कन्नी डिजिटल संपर्क गी होर मजबूत करने पर बी सैहमति जताई। दौनें देशें बशकार भ्याली बुनियाद सांझे मूल्य, संस्कृति ते आध्यात्मिक धरोहर पर आधारत ऐ।

विशेष सीबीआई जज कावेरी बावेजा होरें अत्तरुं रातीं केजरीवाल हुंदी गिरफ्तारी दे बाद कल एह हुक्म जारी कीता। ईडी नै केजरीवाल होरें गी घोटाले दे मुख् साजशकर्ता दस्सदे होई अदालत कोला 10एं दिनें दी रिमांड दी मंग कीती ही। निदेशालय नै आक्खेआ ऐ जे केजरीवाल आबकारी नीति तैआर करने च सिद्दे तौरा पर शामिल हे।



BJP-Delhi

भारतीय जनता पार्टी नै आक्खेआ ऐ जे शराब घोटाले दा षडयंत्र रचने आला आखरकार कनून दी हिरासत च ऐ। एह गल्ल दिल्ली दे मुख्मंत्री अरविंद केजरीवाल होरें गी प्रवर्तन निदेशालय दी हिरासत च भेजने मगरा आक्खी। नमीं दिल्ली च मीडिया गी संबोधत करदे होई वरिष्ठ पार्टी नेता ते केन्द्री मंत्री स्मृति ईरानी होरें अरविंद केजरीवाल होरें गी नशाना बनांदे होई आक्खेआ जे उनें भ्रष्टाचार आस्तै सरकारी मशीनरी दा इस्तेमाल कीता ऐ। उनें आक्खेआ जे देश दिक्खी चुके दा ऐ जे संवैधानिक औहदे पर रौंहदे होई ऐसा मनुक्ख कियां इमानदारी दी मिसाल बनी सकदा ऐ। तोआई आप नेता ते दिल्ली दे मंत्री आतिषी होरें आक्खेआ जे केजरीवाल होर मुख्मंत्री बने दे रौंहगन ते कुसै बी संवैधानिक प्रावधान तैहत उनेंगी स्तीफा देने दी लोड नेई ऐ।



CBSE

केन्द्री माध्यमिक शिक्षा बोर्ड सीबीएसई नै नियमें गी नेई मन्नने ते गलत तरीके कन्नै कम्म करने च शामिल 20 स्कूलें दी बोर्ड कन्नै मानता रद्द करी दित्ती ऐ। इनें स्कूलें च जम्मू कश्मीर दे कठुआ जिले दा करतार पब्लिक स्कूल बी शामिल ऐ। सीबीएसई आस्सेआ जारी अधिसूचना च आक्खेआ गेआ ऐ जे इनें स्कूलें खलाफ एह कारवाई उंदे आस्सेआ बोर्ड दे नियमें दी अनदिक्खी करने ते उंदी पालमा करने च जबरदस्त लागर्जी बरतने दिएं शकैतें दी तस्दीक होने दे बाद कीती गेई ऐ। सीबीएसई नै आक्खेआ जे एह स्कूल जिस चाल्ली दिएं अनियमिताएं पर चला करदे हे, उंदे च डम्मी स्टूडेंट यानि स्कूल नेई आए दे किश बच्चें गी स्कूल च हाजर दस्सना, अयोग्य बच्चें गी दाखला देना, रिकार्ड सेही चाल्ली नेई बनाई रखना बगैरा शामिल न।

जिनेंगी ध्यानै च रखदे होई स्कूलें दी मानता रद्द कीती गई ऐ ते केइएं दा दर्जा घटाया
गेआ ऐ।



Russia Attack

रूस दी राजधानी मास्को दे कोल इक कंसर्ट हाल परिसर च थेआरबंद हमलावरें दी
गोलीबारी च 60 लोक मारे गे न ते 145 शा मते जख्मी होए न। रूस दी सरकारी मीडिया
अजेंसी TASS दी खबर मूजब 3 थेआरबंद हमलावरें मास्को दे बाहरले इलाके च स्थित
क्रोकस सिटी हाल दे अंदर गोलीबारी कीती। वारदात आली थाहरै पर तुरत सुरक्षा कारवाई
टीम-SWAT गी सददेआ गेआ। उत्थें 70 शा मती एम्बुलेसं ते डाक्टरें गी प्रभावितें दी
मदाद च कम्मै पर लाया गेआ। आतंकवादी गुट आईएसआईएस नै इक ब्यान जारी करियै इस
हमले दी जिम्मेदारी लैती ऐ। हालांके आईएसआईएस गुट नै अपने इस दावे दे समर्थन च
सबूत नेई दित्ते न। स्थानीय गवर्नर एंडरे वोरोब्योव होरें आक्खेआ ऐ जे लोकें गी बचाने
लेई सब किश कीता जा'रदा ऐ।



PM-Russia

प्रधानमंत्री नरेन्द्र मोदी होरें मास्को च होए दे आतंकवादी हमले दी सख्त निंदेआ कीती ऐ।
सोशल मीडिया दी इक पोस्ट च उनें आक्खेआ ऐ जे साहड़ियां संवेदना प्रभावत परोआरें दे
कन्नै न। श्री मोदी होरें आक्खेआ जे भारत दुक्खै दी इस घड़ी च रूस दी सरकार ते लोकें
दे कन्नै पूरी तगड़ेयाई कन्नै खड़ोते दा ऐ।



Mumbai

मुंबई दी इक विशेष अदालतै 2008 च मालेगांव च होए दे धमाके आले मामले च बीजेपी
सांसद प्रज्ञा सिंह ठाकुर हुंदे खलाफ पेशी पर हाजर नेई होने पर जारी जमानती वरंट गी
रद्द करी दित्ता ऐ।

इक निजी अस्पताल च 20 मार्च गी भर्ती प्रज्ञा ठाकुर उत्थुआं छुट्टी थोने परैत अदालत च हाजर होइयां जेह्दे परैत इस वरंट गी रद्द करी दित्ता गेआ।

<><><><><><>

Swiss Open

स्विस ओपन बैडमिंटन प्रतियोगिता च भारत दे किदाम्बी श्रीकांत होर सैमीफाइनल च पुज्जी गे न। कल स्विजरलैंड दे बेसल च उनें मर्दे दे सिंगल्स दे क्वार्टरफाइनल च ली चिया हाओ होरें गी 21–10, 21'14 कन्नै हराया। अज्ज फाइनल च उंदा मकाबला ली चुन चि कन्नै होग। मर्दे दे सिंगल्स दे इक दुए क्वार्टरफाइनल मैच च प्रियांशु राजावत होरें गी तियन चेन चाड कोला 15–21, 19–21 कन्नै हार दा सामना करना पेआ। किरण जार्ज होर बी डेनमार्क दे रासमस गेमके कोला हारी गे।

<><><><><><>

IPL

आईपीएल दे 17में संस्करण दे कल खेड्डे गेदे पैहले मैच च चिन्नेई सुपर किंग्स नै रॉयल चैलेंजर्स बेंगलोर गी 6एं विकटें कन्नै हराई दित्ता। एह मैच पिछली रातीं चिन्नेई दे एम.ए. विंदबरम स्टेडियम च होआ। जित्तने लेई 174 रंजें दे लक्ष्य दा पीछा करदे होइ चिन्नेई सुपर किंग्स नै 6 विकटें ते 8 बाल बकाया रौहने पर जित्त हासल करी लेई। पैहले बल्लेबाजी करने दा फ़ैसला करदे होई रॉयल चैलेंजर्स बेंगलोर नै 20 ओवरें च 173 रंज बनाए। मुस्ताफिजुर रहमान नै चिन्नेई सुपर किंग्स आस्ते 4 विकटां हासल कीतियां। उनेंगी प्लेयर ऑफ द मैच घोषत कीता गेआ। अज्ज पंजाब किंग्स दा मकाबला दिल्ली कैपिटल्स कन्नै दपैहरी 3 बजे शुरू होग। दूई बक्खी कोलकाता नाईट राईडर अज्ज कोलकाता च संजा 7 बजे सनराइजर हैदराबाद कन्नै मैदान च उतरगंन।

<><><><><><>

Russia-China

संयुक्त राष्ट्र सुरक्षा काउंसल च गाजा च संघर्ष विराम दे अमरीका दे प्रस्ताह पर रूस ते चीन नै वीटो करी दित्ता ऐ। अमरीका नै एह प्रस्ताह फिलिस्तीनी नागरिकें दी सुरक्षा ते उनेंगी मनुक्खी सहायता पजाने लेई आहन्नेआ हा।

रूस नै अमरीका दी इस गैह गी पाखंड करार दिंदे होई एहदी निंदेआ कीती ते आक्खेआ जे अमरीका जंग रोकने लेई इजराइल पर दबाह बनाने च नाकाम रेआ ऐ। कुल 11 सदस्ये इस प्रस्ताह दे हक च ते 3 सदस्ये एहदे बरोध च वोट पाया।

<><><><><><>